

Franza, et li feci medegar et guarir. Simele a tutti li altri optima compagnia. In questo tempo, prendesemo una fusta de vinti banchi de' turchi, la qual aveva trentasei cristiani presoni. Li scapolasemo, et havessemo 14 teste de sarasini e un bon botin, et io avi per mia decima la fusta; la qual mandai qui a Venetia, et la nostra illustrissima Signoria me la pagerà piacendo al nostro Signor Dio.

In questo mio tempo, intravene che un Todarin Cortatio candioto, patron de un gripo, assassinò un povero merchadante che non haveva altro cha ducati 100. Feci squartar do de i compagni; lui scampò, fo bandito de terre e luogi, secondo l'ordine de justitia. Et furono messi in camera li danari che'l havia robato. Alcuni altri anchor che fecero mal furono maleficiati con diverse sorte di malefici secondo lor meriti; et a la mia tornata, per bona relation del successor mio, fui ben visto et acarezato dal Serenissimo Principe.

135^{b)} Poi fo aldito sier Polo Valaresso qu. sier Gabriel venuto provedador dil Zante, vestito de pano paonazo, et lo steti dentro. Fe' una relation che satisfeece al Colegio. Prima, aver fabricato quel loco e fatto passa . . . di muro; fato el porto dove se pol alzar . . . galie e star securamente, et dove si pagava fitti de magazeni di biscoti ducati . . . a l'anno, ha comprato uno et sparagnà a la Signoria ducati . . . di fitto; ha fato uno ponte a la fiumara di piera, per el qual passava biave et se anegava homeni et animali era di legno con pocha spesa et trovà le fondamenta di una tera antica, et ivi era una arca, qual averta, fo trovà uno homo havia una testa grandissima dentro con una spada a lai molto larga; è cosa di più di 3000 anni, et dita sepultura con altre pierie messe in opera. Ha mandato tre tributi a so tempo al Signor turco per li ducati 500 se li dà a l'anno per la pension dil Zante. Quel loco è molto habitato. Sono in tutto anime 22 milia, in la terra poche, ma nel borgo assae. Sono 52 ville, è una bona isola: et la Signoria è molto inganata per li terreni fo concessi, che hanno più dil suo dover. Sono stratioti 500, de qualli 90 è stratioti boni; Disse dil presente fe' far a la Signoria dil vin per l'Arsenal de bote 300, e la colpa fo nostra a non mandar le bote; pur mandò bote . . . parte donate, parte de condanason per le comprede. Si'l non fo troppo bon, la colpa non è sua. Disse che li fo scritto lettere e laudato de le operation sue. E quanto a tajar le concession fate, parte ha obedito e parte non, perchè saria stà gran di-

(1) La carta 134* è bianca.

sturbo in l'ixola. Disse de l'intrada de l'ixola, qual è di contanti a l'anno ducati, . . . in formenti moza . . . in orzi moza . . . in lin . . . E dil vin la Signoria ne ha alcuna dexima. Et ha fato uno libro a villa per villa, et campo per campo, di quelli paga dexime la Signoria. E si fa 4 vechi quali va a stimar, chi è so amici fa bona stima, li nimici è molto angarizati, *adeo* li vilani se dovevano assae; i quali essendo lui a una villa, veneno da loro a pregar e offerirsi dar per dexima una quarta di formento per certa misura di là, et cussi di orzo et lire . . . di lin per campo, al qual modo facendo si miorirà l'intrada de la Signoria, et si scanserà la spesa de stimadori, et loro vilani resterano contenti. Non ha voluto far da lui; lo aricorda, disse aver fato per armar una galia a ruodolo la description, sichè per ogni caxa mandando ogni anno, tocherà ogni anno, armando ogni 10 anni, uno homo per caxa; et li stratioti non è stà posti in ruodolo. Et fe' lezer una lettera portò con lui, di sier Sebastian Contarini provedador suo successor in fede di tutte queste fabriche et operation optime fate per lui. Disse li conti de la camera e scritture è mal tenute; quel canzelier, è lì, fa poco, ma è homo da ben, maridò la fia in sier Marco Balbi di sier Alvisè, lui el servi di ducati 120 dil so salario, avanti trato per far si bona opera, et adesso è scontadi. Crede meritar laude *etiam* a uno altro contestabele suo, die' danari per maridar so fiola, avanti trato i è scontadi. Disse di Moro Bianco contestabele; havia 59 page, scrisse era bon cassar 19, et cussi fo laudato. Havia 4 caporali, de che ha sparagnà per tal conto ducati . . . a l'anno. Tanto più intrada sarà; perchè quelli dil Zante è fidelissimi a la Signoria. *Item*, disse aver fato una caxa al porto over muolo dove stanno li rectori al venir et compir el rezimento, con pocha spesa, che è una bela opera. Disse se partì con ducati 100 di contadi, e *tamen* lui ha pagà li biscoti si oferse dar a la Signoria per el suo imprestado tutti come apar. Disse dil suo salario nel tempo è stato de li non ha voluto tuorli, se non al finir dil suo rezimento, che è ducati 1800, e questo per salvar i danari dil Camerlengo a spender dove più bisognava: se li avesse tolti, haria vadagnato, ma di 11 fioli havia, è restà uno solo Gabriel, qual era, di anni . . . Disse come comprò una fusta, era di fra' Januzi. La Signoria volse fusse soa, fo contento, la lassò lì, bisognerà sia fato satisfar. Disse el suo precessor harà bona intrada, perchè la camera . . . assai e lo laudò, è homo da ben, e si porterà ben si'l non sarà messo suso. Disse dil borgo dil Zante, qual è case . . . et